

Mud Volapüka

Nüm 9

3 yunul 2016

Rubrig gramatik

Pönops yufik Volapüka

Pönopis yufik Volapüka kanoy leodükön lü nengenik (kel kaladon yegi mödadilo) e pösodik (kaladöl menis e nims).

I pönopis yufik Volapüka kanoy leodükön lü roods sököl:

rood pönopa	pönop jonik		leigasinfavöd
	nengenik	pösodik	
nefümik	an	<i>anan</i>	nefümik, nesevädik
	öm	<i>öman</i>	tel e plu
	bos	ek	seim, fädik
noik	nos	nek	nonik
rezipik	ok		lönik
läodik	al	<i>alan</i>	valasotik
	it		livätik
leigodik	ot		leigik
jonik	at (atos)	<i>atan</i>	nilik
	et (etos)	<i>etan</i>	fagik
	som	<i>soman</i>	soik, äsä
	ut (utos)	<i>utan</i>	büo pemäniotöl

An, anan

Vöd ‚an‘ kaladon yegi *nesevädik u no papatöl*:

ven ukömob domio, umaifükob gladaramari ed ofidob **ani** (fidi **anik** fidovik, **no sevob** fidi kel ofidob)

sevob *Volapükani anik* = sevob *Volapükani bal*, **ab no memob u no vilob patön nemi u patöfis ona (lepükob te das sevob Volapükani nefümik)**

sevob **anani** = sevob **meni anik**

m, man

Vöd ‚öm‘ kaladon yegis *tel e plu fädik* de grup:

ven ägolob domio ad fidön ani, äkolkömob **ömanis** (*menis lul*, samo) bevü kels kilans binons flens obik = äkolkömob **menis ömik** = *menis lul anik*

Bos, ek

Vöds ‚bos‘, ‚ek‘ kaladons yegi *fädik* (mödadilo nesevädik) de grup:

ven ukömob domio, umaifükob gladaramari ed ofidob **bosi** (fidi *anik* fidovik, **no binos veütik** pro ob fidi kel ofidob)

ek sevon-li tutisanöpi? = dabinon-li is men (**no binos veütik kinik**) kel sevon-li tutisanöpi?

Nos, nek

Vöds ‚nos‘, ‚nek‘ jonons das yeg u men ko patöf pajonöl *no dabinon*:

nek ukömon adelo = men **no dabinon** kel ukömon adelo

Noet: pönops noik ya kipädons noami, klu no zesüdos ad gebön vödili noik ‚no‘:

sagol obe **nosi nulik** = **no** sagol obe **bosi nulik**

Ok

Vöd ‚ok‘ jonons yegi kel pakaladon in set e sinifon das dun (jäfid) värba lüälikon drefäbi:

ezibob **oki** = ezibob **obi** (ok leigon ob is)

ezibol **oki** = ezibol **oli** (ok leigon ol is)

ezibob dogi **okik** = ezibob dogi **oba**

ezibol dogi okik = ezibol dogi ola

Al, alan

Vöd ‚al‘ kaladon yegi bal grupa e jonon das kalad pajonöl tefon i yegis votik de grup (sis balid jü lätik):

alan sevon nemi okik = men **alik** sevon nemi okik = mens **valik** sevon nemi okik

al labon suämi = yeg **alik** labon suämi = yegs **valik** labons suämi

It

Vöd ‚it‘ jonon das drefäb dunon duni (jäfidi) värba *livätiko*:

ob **it** ereidob buki = *ob* **e te ob** ereidob buki = **efe (ebo, soäs)**
ob ereidob buki

Ot

Vöd ‚ot‘ jonon das yeg *leigon* yegi votik u binon yeg votik:

eremob *buki* ot, keli flen obik labol = eremob *buki* kel **leigikon**
buki keli flen obik labol

At

Vöd ,at' jonon yegi kel *pladikon is*, len spikan:

vilob remön *buki at* = vilob remön *buki kel pladikon len ob*

atan uträtom obis = **men at** uträtom obis

atos binon vemo nitedik = **yeg at** (samo, jenöfot) binon vemo nitedik

Et

Vöd ,et' jonon yegi kel *pladikon us, fagiko de spikan*:

vilob remön *buki et*, keli flen obik labol = vilob remön *buki kel pladikon fagiko de ob* e keli flen obik labol

Som

Vöd ,som' jonon das yeg *labon patöfis kel leigik patöfis yega votik*:

vilob remön *buki somik*, keli flen obik labol = vilob remön *buki ot*, keli flen obik labol

soman obinon letälen = **men somik (ko patöfs sümik)** ukanob vedön letäleni

Labol-li *gretoti somik*? Si, **som** komon. = Labol-li *gretoti kel liegon ati*? Si, **gretot sümik** komon.

Ut

Vöd ‚som‘ pagebon ad *jonön yegi kel pemänioton büo ud as givulot nema yegi*:

Labol-li *buki somik*? Si, **ut** komon. = Labol-li *buki somik*? Si, **buk somik** komon.

sevob **utosi keli** klänedol = sevob (**kläni keli**) *kelosi* klänedol

utans kels kondöton oki gudiko pagevons legivotis yelacenic = **mens** kels kondöton oki gudiko pagevons legivotis yelacenic

Semik, seimik

I prilags pönopik dabinons: ‚semik‘ e ‚seimik‘. Vöd ‚semik‘ kaladon yegi bal *sevädik*, ab vöd ‚seimik‘ kaladon yegi *nesevädik alik* de grup.

eremob *buki semik* (samo, kel labon köli, keli plidob)


eremob *buki* **seimik** (samo, buki fädik keli ilogob balido; no älogob igo nemi ona)

fidob *fidi* **semik** (samo, binob härbatiman e fidob te härbatis)

fidob *fidi* **seimik** (no välob fidi, keli fidob)

Sevols-li, das ... Brunän





1) Brunän binon län in Siyop Sulüdalofüdik kel idagetob libi okik de Britän ün yel 1984. Läni maston famül bal sultanas ya ünü yels plu 600. Nem läna ,دار السلام, patraduton de Malayänapük as ,Bliböp püda'.

2) Brunän binon bal länas liegikün vola demü setratükam e sel petrola. Kildil lödanas lödons tö cifazif ,Bandar Seri Begawan' e ti dil retik utanas lödons len länedes petrola.

3) Sultan Brunäna binon bal menas liegikün vola. Labom konleti toodas lüxüödik mö 2879, kel pladikon ini garad mö kvadamilmet bal. I

iremom flitömi suämöl dolaris tumbalion pro dekam ninik kela voto dolars tumteldegbalion pisegivons.



4) Ledom calöfik sultana atimik pifibumon ün yel 1984, panemon 'ایستان نورول ایمان', (Ledom lita lekreda') e binon gretikün regadom vola. Ledom at labon sürfati mö kvadamets 200000 e ninädon: cemis 1788 bevü kels uts 257 binons banacems, lecemi daifik kel kanon kipädön vüdäbis plu lulmil leigüpo, mascidi ninik pro plekans plu 1500, garad pro toods 110, basinis 5. Vitürs, yanahogs, gleipeds e notets votik pidekons fa goldin.



5) Logöfot ledinik Brunäna binon „Mascid hiela ‚Omar Ali‘“ pinemon nemü sultan teldegjölid. Glöpot ledinik uta pitegon fa goldin lölik (no laliadik).

6) Brunän binon davedöp jispotana jiel ‚Maziah Mahusin‘.



Lerät



Ün yel 1940 milit Deutänik ikoupon Fransäni. Fizirs ela ,Wehrmacht' mödadilo ipladikons tö lödadoms gudikün, tö zifaziläks benolabikün, ko möbem jerikün. Ab fizirs ömik älogons tö lödadoms at das lödadom it piklinükon gudiko, möbem valik pipladon leodiko ab pänot su völ älagon slobiko klieniko. Kikodo pänot älagon so neleodiko?

Tuvedot: in nüm sököl.

Tuvedot leräta se nüm büik:

Balat balik at binon nilädans.

Säkis, küpetis e lofotis aliks ä materis e volanuns nitediks kanols lüsedön lü penedabog «komunan@yandex.ru».